

Evening Dogri News Bulletin,

21 September. 2025 .18:15 Hrs

Headlines

- प्रधानमंत्री नरेंद्र मोदी होरें मुलख गी संबोधित कीता। आखेआ जे जीएसटी सुधार दी अमलावरी मुलख दे लोकें आस्तै बचत उत्सव दी शुरूआत ऐ।
- झीलां ते दरेआ मनुक्खता लेई जीवनरेखा न ते नागरिकें गी इन्दे संरक्षण लेई किट्टे रलिए जन्न करने लोड़चदे, आखेआ उपराज्यपाल मनोज सिन्हा होरें।
- उधमपुर पार्लिमानी हल्के लेई 2 ज्हार करोड़ रपे दी लागत कन्नै 110 नमें शिड़क प्रौजैक्टें गी मंजूरी दिती गेई।
- कल्लै थमां शुरू होआ'रदे नराता उतसव लेई श्री माता वैष्णो देवी श्राइन गी फुल्लें कन्नै सजाया गेदा ऐ।
- एशिया कप टी-20 क्रिकेट प्रतियोगिता च भारत दा मुकाबला पाकिस्तान कन्नै होगा।

<><><><><><>

PM-Address

प्रधानमंत्री नरेंद्र मोदी होरें अज्ज संझा राश्ट्र गी संबोधित कीता। अपने भाषण च प्रधानमंत्री होरें आखेआ जे कल्लै थमां मुलख भरै च नरातें दा त्यौहार शुरू होआ'रदा ऐ ते इस शुभ मौके पर "आत्मनिर्भर भारत" अभियान बी शुरू कीता जाग, जेदे तैहत कल्लै थमां अगली पीढी दे जीएसटी सुधारें गी बी लागू कीता जाग। प्रधानमंत्री होरें जीएसटी सुधारें गी लागू करने गी बचत उत्सव करार दिता। उनें आखेआ जे बचत उत्सव कन्नै गरीबें, आम लोकें, मध्यम वर्गीय लोकें, नौजोआनें, करसानें, बपारियें ते दकानदारें सने समाज दे हर माहनू गी लाह हासल होगा। उनें गलाया जे "इक्क मुलख इक टैक्स" दा नजरिया हकीकत च तब्दील होई गेआ ते आखेआ जे सुधार इक जारी रौहने आहली प्रक्रिया ऐ।



LG-Sewa Parv

मुख्य भरै च चलै करदे 'सेवा पर्व' दे इक हिस्से दे तौरा पर उपराज्यपाल मनोज सिन्हा होरें अज्ज श्रीनगर दी डल झील च शुरू कीते गेदे सफाई अभियान च शिरकत कीती। इस मौके एलजी होरें आखेआ जे पिछले 5एं बरें दरान कीते गेदे अनथक जत्तें दी बदोलत डल झील दे त्रीए हिस्से कोला मते इलाकें गी साफ करियै एहदे च नमे सिरेआ जान भरी गई ऐ। झील दे इक बड्डे हिस्से चा जडी ते होर दुए किस्में दियां बेलां बूहअे हटाइयै इसी साफ कीता गेआ ऐ ते पैहली बारी एल्लै एहदा कोइ, 20 मुरब्बा किलोमीटर कोला मता हिस्सा खुल्ले ते साफ पानी आह्ला ऐ। मनोज सिन्हा होरें आम लोकें अगगे अपील कीती जे ओहू डल झील दे अलावा होरनें दरयाएं-नदिएं सरें बगौरा दे संरक्षण दे कम्में च इक जिम्मेदार शैहरी दे रूपै च अपनी जिम्मेदारी निभान तां जे स्हाडे एहू जल स्रोत ना छडा साफ-सुथरे बने दे रौहन, सगुआं इनेंगी दिक्खने औने आहले मते-मते लोक इत्त बक्खी आकर्षित होन।



LG-Delegation

भारत CSR Network दे चेयरमैन डॉ. साजिद एन. सैयद हुंदी अगुवाई च भारत आस्ट्रेलियन प्रतिनिधिमंडल नै उपराज्यपाल मनोज सिन्हा हुंदे कन्नै मलाटी कीती। प्रतिनिधिमंडल दे मिम्बरें जम्मू-कश्मीर लेई कई सारे प्रोग्रामें दा प्रस्ताव दिता जिंदे च 10 स्मार्ट विलेजेस, ए.आई लैब, वेस्ट टू वेल्थ प्रोग्राम शामिल हे। उपराज्यपाल होरें केंद्र शासित प्रदेश दे विकास ते समुदाय दे सशक्तिकरण प्रति उंदी बचबनद्धता दी सराहना कीती। उनें इनें प्रस्तावें दी अमलावरी आस्तै प्रशासन आसेआ हर चाल्ली दी इमदाद दा भरोसा दोआया।



CM-Sports

मुख्यमंत्री उमर अब्दुल्ला होरें आखेआ ऐ जे उंदी सरकार खेड्डें ते एहदे विकास लेई सरबंधी ढांचे पर विशेष ध्यान देआ'रदी ऐ ते शायद गै ऐसा कोई हल्का ऐ जित्थे खेड्डु सरबंधी विकास नेई कीता जा'रदा ऐ। उनें आखेआ जे सरकार बक्ख-बक्ख इलाकें च उनें खेड्डें दी पंछान करा'रदी ऐ जेडी नौजोआनें च मती पसंदीदा न जिआं क्रिकेट,

फुटबॉल, जिमनास्टिक ते वॉलीबॉल ते एहू कोश्ट कीती जा'रदी ऐ जे सरकार आसेआ नोओआनें गी इनें खेड्डें लेई जरूरी स्थूलतां मुहैया कराई जान। मुखमंत्री उमर अब्दुल्ला होरें गलाया जे कश्मीर मैराथान दा दुआ संस्करण 2 नवम्बर गी शुरू होआ'रदा ऐ। उनें मुख भरै थमां खडारियें गी सद्दा दित्ता जे ओहू मैराथान च हिस्सा लैने लेई श्रीनगर औन। मीडिया आहलें कन्नै गल्ल करदे होई मुखमंत्री होरें आखेआ।

<><><><><><>

Seva Parv UPI

सेवा ते सुशासन यानि जनसेवा ते सुशासन दे मंत्र थमां प्रेरित होइऐ, प्रधानमंत्री नरेंद्र मोदी हुंदी अगुवाई च सरकार बदलाव ते प्रगति आस्तै लगातार अनथक जत्न करा'रदी ऐ। इस विशेष श्रृंखला सेवा पर्व च अज्ज अस तुंदे लेई लेइऐ आए आं जे कियां प्रधानमंत्री नरेंद्र मोदी हुंदी सरकार नै U.P.I. क्रांति दी अगुवाई कीती ते डिजिटल भुगतान गी सब्बने लेई सौखा ते सुरक्षित बनाया। अगस्त 2025 च U.P.I. राएं बिलियन transactions होइयां। सुतंत्रता दिवस दे अपने इस बारी आहले संबोधन च प्रधानमंत्री नरेंद्र मोदी होरें U.P.I. दी ताकत दी गल्ल कीती ही ते आखेआ हा।

<><><><><><>

Prog.Announcement

आकाशवाणी जम्मू दा क्षेत्रीय समाचार एकांश मुख भरै च मनाए जा'रदे सेवा पर्व-2025 दे सरबंधै च कुल 8 कार्यक्रमें दी बशेश श्रृंखला प्रसारत करा'रदा ऐ जेह्दे तैहत संगारें 22 सितंबर गी 25एं मिनटें दा इक कार्यक्रम पेश कीता जाह्ग ऐ जेह्दा विशे ऐ “पर्पल रेवोल्यूशन दे राहें ग्रामीण अर्थ बवस्था दा सशक्तिकरण”। एहू बशेश प्रसारण कल 22 सितम्बर गी दपैहरी 12 बजे कीता जाग। एह्दे च स्हाडे खास परौहने होडन सी.एस.आई.आर.-ट्रिपल आई.एम जम्मू दे डरेक्टर डॉ. जबीर अहमद जेडे इस विशे दे बक्ख-बक्ख पैहलुएं पर अपने माहिराना बचार सांझे करडन। इस कार्यक्रम दा संचालन करडन स्हाडी न्यूज एंकर अभिलाषा शर्मा ते श्रुति खजूरिया। इस

परिचर्चा गी तुस मिडियम वेव 303 मीटर यानि 990 किलोहर्टज पर ते एफ.एम 100.3 मेगाहर्टज पर सुनी सकदे ओ।



Roads-Sanctioned

ग्रामीण विकास मंत्रालय नै 2025-26 आहले माली बरे लेई प्रधानमंत्री ग्राम सड़क योजना दे चौथे गेढ दे पेहले बैच तैहत उधमपुर-कठुआ-डोडा लोकसभा हल्का च 110 नमीं शिड़क परियोजनाएं गी मंजूरी देई दिती ऐ। तकरीबन 2 ज्हार करोड़ रुपें दी लागत आहली इनें परियोजनाएं कन्नै खित्ते दे 178 इलाकें च हर मौसम च शिड़क राबता यकीनी बनी सकोग। केंद्री राई-बाई ते ग्रामीण विकास मंत्री शिवराज सिंह चौहान होरें इस बारै प्रधानमंत्री हुंदे दफतरै च केंद्री राज्यमंत्री डॉ. जितेंद्र सिंह होरें गी जानकारी दिती। डॉ. जितेंद्र सिंह होरें केंद्र सरकार दा धन्नवाद करदे होई आखेआ जे इनें परियोजनाएं कन्नै ग्रामीण लोकें आस्तै यात्रा च सखाल होग ते शिड़क राबता बी बेहतर होग।



Navratra-Festival

कल्लै थमां शुरू होआ'रदे नरातें दे त्यौहार गी दिखदे होई श्री माता वैष्णो देवी श्राइन बोर्ड ते पवित्तर शैहर कटडा ज्हारां बदे श्रद्धालुएं दे सोआगत लेई पूरी चाल्ली तैयार न। श्राइन बोर्ड आसेआ श्रद्धालुएं गी आध्यात्मिक तीर्थ यात्रा दा अनुभव करोआने लेई सब्बे लोडचदे बंदोबस्त करी लैते गेदे न। 9 दिनें दे इस उत्सव दी तैयारी लेई भवन, अर्धकुंवारी, भैरो मंदर ते पवित्तर गुफा बक्खी जाने आहले पूरे रस्ते गी फुल्लें, रंगी-बरंगी लाइटें ते रिवायती डिजाइनें कन्नै सजाया गेदा ऐ। अंदर आहले गर्भगृह गी खास करियै तां जे मौसमी फुल्लें ते थीम आहली सजावट कन्नै सनाखड़ा बनाया गेदा ऐ। नरातें लेई कीते गेदे बंदोबस्तें दी सराहना करदे होई श्रद्धालुएं आखेआ।



GST-Reforms

अगली पीढी दे जीएसटी सुधार कल्लै थमां लागू होआ'रदे न। प्रधानमंत्री नरेंद्र मोदी होरें सुतंत्रता दिवस पर लाल किले दी प्राचीर थमां अगली पीढी दे जीएसटी सुधारें दी घोषणा कीती ही। उंदा एहू सुखना इस म्हीने दी त्रै तरीक गी उसलै साकार होआ जिसलै जीएसटी परिषद नै नागरिकें दे जीवन गी सौकखा बनाने आस्तै कई क्षेत्रें च कर दिएं दरें च कटौती कीती। परिषद नै 2 सतहें आहले टैक्स सरिस्ते दी गल्ल कीती। एहदे अलावा किश चुनिंदा चीजें पर जेदे च तम्बाकू ते लगजरी चीजां शामिल न, उन्दे पर 40 फीसद टैक्स लगग। हुन 5 ते 18 फीसद दी टैक्स स्लैब होग। लोकें इस फैसले दा सुआगत कीता ऐ ते आखेआ।

<><><><><><>

Seva Parv Ramban

चला'रदे सेवा पर्व आहले जत्र तैहत मच्छी पालन मैहकमे आसेआ रामबन जिले दे मच्छी पालकें आस्तै इक जागरूकता शिविर दा सरिस्ता कीता गेआ। इस दरान उनेंगी सरकार दी बक्ख-बक्ख स्कीमें ते सेवाएं बारै जानकार बनाया गेआ। एहदा मकसद इनें लोकें गी प्रधानमंत्री मत्स्य संपदा योजना, राई-बाई दे पूरे-पराते विकास सरबन्धी प्रोग्राम ते किसान दोहार कार्ड बारै जानकारी उपलब्ध करोआना हा तां जे एहू लोक इनें स्कीमें थमां लाहू ठोआई सकन। इस बारै होर मती जानकारी दिंदे होई मच्छी पालन मैहकमा रामबन दे सहायक निदेशक अतुल्लाह खान होरें आखेआ।

<><><><><><>

India Pak Match

दुबई च एशिया कप टी-20 क्रिकेट च अज्ज भारत दा सामना पाकिस्तान कन्नै होग। एहू मैच भारतीय समें मूजब रातीं 8 बजे थमां शुरू होग। प्रतियोगिता च दौनें टीमें बश्कार एहू दुआ मुकाबला होग। भारत नै पिछले हफ्ते होए दे मुकाबले च पाकिस्तान पर 7 विकटें कन्नै शानदार जित्त हासल कीती। एशिया कप दे इतिहास च भारत सब्बने थमां सफल टीम रेई दी ऐ जिन्नै 8 बारी खिताब अपने नाऽ कीता। एहदे बाद श्रीलंका नै 6 बारी ते पाकिस्तान नै छड़ा 2 बारी एहू प्रतियोगिता जिती ऐ।

<><><><><><>